

# Priroda i društvo

Informativni bilten Udruženja Eko akcija Sarajevo

Br. 9, maj 2021.

## OFANZIVA VLADE KANTONA NA ČISTI ZRAK I PROSTORE SARAJEVA!



Nastavi li se s politikom gradnje visokih objekata – Sarajevo više nikad neće prodisati.

### **Vlada Kantona Sarajevo je 12. maja poništila Odluku o ventilacionim koridorima i time širom otvorila vrata za nastavak betoniranja Sarajeva koje je započela SDA.**

Odluka je savršeno tempirana da se javnost ne dosjeti – dan pred Bajram, a u vrijeme kad su mediji fokusirani na tragediju Palestinaca u Gazi.

**Vlada je i ovu odluku od posebnog značaja za naš okoliš donijela bez ikakvih javnih rasprava, uprkos intenzivnom reklamiranju vlastite transparentnosti.**

Zahvaljujući ovom manevru sada Trojke (NiP, NS, SDP) gradiće se niz novih tajkunskih nebodera – Skenderija, Marindvor, Strojorad, RTV dom itd.

Ti neboderi nisu potrebni stanovnicima grada.

Stanovništvo će se i dalje gušiti u smogu a od zelenih površina ostaće žardinjere i poneko drvo koje zasade političari.

## OTKUD PRVOBITNA ODLUKA? ŠTA JE UTVRDILA STUDIJA O VENTILACIONIM KORIDORIMA?

Vlada Kantona Sarajevo donijela je Odluku o ventilacionim koridorima prošle godine s ciljem da se olakša protok zraka u sarajevskoj kotlini i time smanji aerozagađenje.

Odluka se zasniva na Studiji o urbanim ventilacionim koridorima i uticaju visoke gradnje. Studija je sačinjena kao dio Zelenog kantonalnog akcionog plana, a u okviru programa Evropske banke za obnovu i razvoj (EBRD) 'Zeleni gradovi'. Britanska kompanija Atkins je u studiji utvrdila da visoki objekti mogu spriječiti strujanje zraka koje raspršuje aerozagađenje.

## DA LI JE ODLUKA UKINUTA NA TEMELJU NEUSTAVNOSTI?

Ustavni sud Federacije Bosne i Hercegovine donio je presudu 21. aprila ove godine da Odlukom o privremenim mjerama zaštite ventilacionih koridora (utvrđenih Studijom o urbanim ventilacionim koridorima i utjecaju visokih zgrada) **nije povrijeđeno** pravo opštine Novi Grad na lokalnu samoupravu. Drugim riječima, Vlada Kantona (u prethodnom sazivu) imala je puna zakonska ovlaštenja da donese tu odluku.

Tekuća Vlada je upoznata s presudom, no ipak 12. maja poništava Odluku uz kampanju dezinformisanja javnosti koju provode nadležni ministar Enver Hadžiahmetović i njegov stranački šef Elmedin Konaković.

*Šta kaže zakon*

## VISOKA GRADNJA U SARAJEVU JE ZABRANJENA VEĆ TRIDESET GODINA!

U Sarajevu još uvijek važi Urbanistički plan (zakonski akt koji je najvažniji planski dokument za regulisanje gradnje akon Prostornog plana) usvojen 1990. godine. Tim planom, s kojim moraju biti usklađeni svi planovi nižeg reda (npr. opštinski), zabranjena je visoka gradnja.

*Izbjegavati izgradnju visokih objekata, jer oni u uslovi-  
ma toplotnog otoka utiču na pojačanje vertikalnog strujanja  
(efekat dimnjaka) što izaziva turbulenciju i snažno lokalno  
strujanje, koje je veoma neugodno i doprinosi porastu koncentracije  
štetnih materija u okolini i uz sam objekat.*

*Urbanistički plan Grada Sarajeva, 15. marta 1990. godine*

Pomenuta studija o visokoj gradnji potvrdila je ove davno napravljene dijagnoze. One su poslije pretočene u urbanistički plan – dokument sa zakonskom snagom koji su obavezni uvažavati i prošli i budući opštinski načelnici.

## Kako pokazuje najnovija odluka Vlade Trojke – na izborima u Sarajevu na kraju uvijek pobijedi građevinska stranka.

U gradu u kojem je još prije pet godina, prema rezultatima popisa iz 2013. godine, svaki četvrti stan bio PRAZAN, nastavlja se grabež preostalog slobodnog prostora i potpuno neplanska izgradnja.

Uprkos zabrani nametnutoj Urbanističkim planom i uprkos nalazima Studije, snažni građevinski lobiji nastavljaju realizovati svoje planove – **bez obzira ko je na vlasti.**

## ŠTA NAS ČEKA?

Zahvaljujući ovom manevru sada Trojke (NiP, NS, SDP) narednih godina gradiće se niz novih tajkunskih nebo-dera – Skenderija, Marindvor, Pofalići, Strojorad, RTV dom itd. Očekuju nas dodatne gužve na saobraćajnicama, sve manje zelenih površina, dodatni problemi s ionako problematičnim parkiranjem i dugi zimski mjeseci u smogu.

Za vlast koja se predstavljala kao alternativa dosadašnjoj politici i koja je isticala svoju opredijeljenost za rješenja zasnovana na struci i nauci, Trojka se pokazuje kao dostojan nasljednik klike koja je vladala prethodne tri decenije na štetu grada i njegovih ljudi.